





特別
18
3414
3






門 八 18
號 3414
卷 3

御訂全金詩增補中州集卷五

金元好問原本

張祕書斛 一十八首

斛字德容漁陽人仕宋為武陵守國初理
索北歸官祕書省著作郎有南游北歸等
詩行於世漁陽有峒陽故詩中多及之如



賦小孤山云天圍秋漲澗山背夕陽孤岸
樹晴猶溼汀煙近却無巫山對月云雲開
千里月風動一天星河池出郭云細草沙
邊樹疎烟嶺外村中江縣樓云綠漲他山
雨青浮近市煙中秋云月色四時好人心
此夜偏松門峽云春木有秀色野雲無俗
姿賦禮部侍郎張浩然遼海亭云晴光搖
碧海遠色帶滄洲又賦臨漪亭云雨聲喧

莫島水色藉秋空秋興樓云碣石晚風催
鴈急昭祁寒漲與雲平人多誦之子嘗見
其文筆字畫皆有前輩風調宇文大學甚
激賞之

沙邊

晚雨漲平堤沙邊獨杖藜長風催鴈北衆水避潮
西楚客相逢少吳天入望低故園無路到春草自
萋萋

東川春日

巴蜀三年客江湖萬里情
滄波何處盡歸棹幾時
行世態浮雲變春愁細草生
羣山遮望眼片月上
高城

巫山對月懷湖外親友

衆壑歛新雨孤舟增莫寒
巫山今夜月湘水幾人
看不得臨湖醉惟愁下峽難
雙魚憑寄遠尺素勸
加餐

武陵春雪

天風吹雪滿千山不見桃花汎碧瀾
洞裏仙人貪種玉豈知人世有春寒

盧臺峭帆亭

高秋客未還何處望鄉關
喬木蒼烟外孤亭落照
間雨晴山覺近潮滿水如閒
目斷峒陽路歸雲不可攀

高寺

高寺鳴鐘後孤舟落鴈邊已知歸徑晚故就上方
眠石峻溜聲急月高松影圓明朝下煙靄迴首阻
清川

寓中江縣樓

武江斜轉石文岫獨參天江日玄武山日文達綠漲他山雨
青浮近市烟松薪炊白粲水蔓繫紅鮮自喜飄蓬
跡安居過兩年

迴文二首

野曠悲行客湍驚礙去船夜江清汎月秋草碧連
天

綠逕斜縈草紅梢半落花曲池風碎月欹岸雨摧
沙

仙門驛聽泉

一亭圍古木雙磴瀉清流行到雲山莫卧聞風雨
秋客塵何日浣病渴此時瘳歸去南溪上輕舟細
浪浮

夜雨南山

雨夜宿山齋夜深雨聲息石室含餘清風枝墮殘

滴

平安關道中二首

高林俯青冥柯葉森若織陽光已轉午陰嶺仍半
黑崢嶸亂石間行子有苦色臨深地勢入涉險天
宇塞四顧無所投迹爾去未息悵然增百憂冥冥
羨歸翼

窮冬十日陰積雪千山路晴雲開半嶺落日猶在
樹悠悠客心速慘慘天色莫寒鳥各有依解鞍尚
無處游魚誤銜鈎玄豹終隱霧行行謝冠冕復我
林壑趣

將渡江

無數飛花委路塵不堪重醉楚城春明朝回首江
南岸煙雨昏昏不見人

還家

雲林無俗姿相對可終老如何塵中人不見青山
好

訪香林老

風雨無時浪蹴天南浮舟楫信多艱半生夢破寒
江月萬里春回故國山歸客自傷青鬢改高僧長
共白雲閒誅茅藉我溪西地未厭相從水石間

海邊亭爲浩然賦

夙有滄洲趣雲扃夢幾回臨深疑地盡望遠覺天

開月湧冰輪出濤翻雪陣來無機同海客鷗鳥莫
相猜

南京遇馬丈朝美

浮雲久與故山違茅棟如存尚可依行路相逢初
似夢舊游重到復疑非滄江萬里悲南渡白髮幾
人能北歸二十年前河上月尊前還共惜清輝

蔡丞相松年

五十九首

松年字伯堅父靖宋季守燕山仕國朝爲
翰林學士伯堅行臺尚書省令史出身官
至尚書右丞相鎮陽別業有蕭閒堂自號
蕭閒老人薨謚文簡百年以來樂府推伯
堅與吳彥高號吳蔡體有集行於世其一
自序云王夷甫神情高秀宅心物外爲天
下稱首言少無宦情使其雅詠玄虛不經

世務超然遂終其身則亦何必減嵇阮輩
而當衰世頽俗力不可爲之時不能遠引
高蹈顛危之禍卒與晉俱爲千古名士之
恨又嘗讀山陰詩引考其論古今感慨事
物之變旣言修短隨化期於共盡而世殊
事異興懷一致則死生終始物理之常正
當乘化歸盡何足深歎乃區區列敘一時
述作刊紀歲月豈逸少之清真簡裁亦未

盡忘情於此耶故因作歌併及之好問按
此歌以離騷痛飲爲首句公樂府中最得
意者讀之則其平生自處爲可見矣二子
珪字正甫璋字特甫俱第進士號稱文章
家正甫遂爲國朝文宗特甫非其比也自
大學至正甫皆有書名其筆法如出一手
前輩之貴家學蓋如此

晚夏驛騎再之涼陘觀獵山間往來十有五

日因書成詩

兜羅葱鬱浮空青曉日馬頭雙眼明
名山不作世俗態千里傾蓋來相迎
老松閱世幾千尺玉骨冷風戰天碧
應笑年年空往來塵土勞生種陳迹
山回晚宿一川花翦金裁碧明烟沙
寒鄉絕艷自開落欲慰寂寞無流霞
明日行營獵山麓古樹寒泉更深綠
強臨水玉照鬢毛只恐山靈怪吾俗
陂潮不盡水如天清波白鷗自在眠
平時朝市手遮日

思把一竿呼釣船驛騎回時山更好
過雨秋容淨如埽山英知我宦游心
爲出清光慰枯槁可憐歲月易侵尋
慙愧山川知我心一行作吏豈得已
歸意久在西山岑他年俗累麓能畢
雲水一區供老佚舉杯西北酌山川
爲道此言吾不食

漫成

人生各有適一受不可更違已
欲徇世憂患常相嬰三軍護漢將
九鼎調蒼生功名豈不美強之輒

無成朝昏忘寢食俯仰勞心形何如從所好足以
安餘齡予也一丘壑野性真難名力懦謝提劍才
拙慙窮經疎放已成僻紛華誰與爭驚鹿便草豐
白鷗願江清不堪行作吏萬累方營營夜慮多俗
夢曉枕無餘醒拄頰西山語適意千里羹塵土走
歲月秋光浮宦情欲語箇中趣知音耿晨星世途
古今險方寸風濤驚封侯有骨相使鬼須銅腥誓
收此身去田園事春畊

淮南道中五首

南楚二月雨淮天如漏卮畏途泥三尺車馬真雞
棲却思閒居樂雨具無所施高枕聽簷聲爐烟暈
如絲

吾年過五十所過知前非顏鬢日蒼蒼老境行相
追櫟棹聽俯仰隨人欲何爲歸計勿悠悠出處吾
自知

南渡國不競晉民益瘡痍陶翁遂超然不忍啜其

醜北窓談清風慨望羲皇時道喪可奈何抱琴酒
一卮

三年鎮陽遊春歸綠扶疎櫻筍媚園林日長閒枕
書行復當此時涼塵暗歸塗會洗醪醑雪月波浮
祕壺

鎮陽亘西南山河在圖畫花雨草烟間人家或僧
舍經行每悵然真賞知未暇待予籃輿歸香火復
蓮社

丁巳九月夢與范季霑同登北潭之臨芳亭
覺而作詩記其事以示范

高陵五六松潭水涵清陰白鳥如避世巢居得幽
深雜花眩青紅苦節方森森何人作虛亭想像雲
棲心我夢涉陳迹君亦同登臨相與定嘉名洗去
花草淫看雲撫修碧夕景低遙岑風林淡秋月霜
枝鳴玉琴兩意誰識之好處煩幽尋閒居志則同
歲月能駸駸時無陶彭澤此曲難知音亭前有奇

石遷流失山林顧亦如我曹鬢髮風沙侵小兒重
外物列屋享千金區區心甚長困循困華簪忽焉
事大謬危機恐難任平生下澤車斯言吾所欽志
士願不辱俗情便孔壬自喜迹猶淺鳧容浮沉
泥行自蕭散世路皆崎嶇此邦真可老城郭環清
潯結廬與君俱開寫平生襟里巷日還往杖屨行
謳吟還尋夢遊處無忘神所箴

庚申閏月從師還自潁上對新月獨酌十三

首

伊昔三年前淫雨催行輶青燈忽今夕華屋映高
秋華屋亦何爲百年竟山丘適意在歸與肉食非
我謀

大塊本何事遑遑勞一生所過種陳迹歲月如流
星貪夫甘死禍幅紙馳虛名晉室有先覺柴桑老
淵明

我家恒山陽山光碧無賴月窟蔭風篁十里瀉澎

泮茲焉有樂地不去欲誰待自要塵網中低眉受
機械

人言歸甚易但苦食不足必使極其求萬鍾不盈
腹處世附所安無禍卽無福却視高蓋車身寵神
已辱

我本山澤人孤烟一輕蓑功名無骨相彫琢傷天
和未能遽免俗尚爾同其波梧桐喚歸夢無奈秋
聲何

孟夏幽州道上陘車轆轤旌旗却南行飛電隨馬
足行窮清潁水不辨洗蒸溽吾生豈匏瓜一笑爲
捧腹

燈花何太喜似報天雨霽客情念還家如瞽不忘
視到家問松菊早作解官計青鏡髮蕭蕭及此霜
雪未

鳴蛙屬官私庸兒固可笑江山本誰爭但苦歸不
早物情閒始見宛轉爲君好區區乞鑑湖多事憐

賀老

天下任之重人物古難得誰爲經濟才有亦未易
識吾曹與雞鶩官倉等伏食行將問征途滿眼西
山碧

懦微莫如我往往從險艱譬之驅山麋八鑿困天
閑豈惟物違性成功亦良難風煙念何地野水長
松閒

出處士大節倚伏殊茫茫絕交苟不作自足存嵇

康哲人乃知機曲士迷其方顧我類社櫟匠石端
相忘

問舍前年秋已買潭西地高明鬼所瞰聊取風雨
蔽瀕溪樹嘉木成陰十年計仍當作茅舍名之以
今是

斯言已饒饒要未離憂患何時但飲酒臧否了不
關不飲逝者多秋草麒麟閒懷哉竹林人吾方仰
高山

七月還祁

洪河注天南兵氣橫高穹我從兵前來歸心疾驚
鴻官柳未搖落蓮荇香濛濛吏舍在前村舊年養
疎慵爰自三軍去青苔瘞人蹤夕陽叩柴門歡迎
來僕僮濁酒古罍洗停觴問新松却對一牀書睡
鴨孤烟中土花暈湖玉冰絃冷霜桐燈火未可親
露坐茅堂東西山月中淡夜茶煮松風到牀便安
寢不復知晨鐘平生幽棲心斯言畧形容人道動

有患百態交相攻而我觸類真冶容鄙青紅非才
見臨事叩之輒空空知難不知回飄流劇飛蓬暫
去聲利場樂佚猶無窮況於得行意瀟灑畢此躬
勿爲才者傳從渠作夔龍

庚戌九日還自上都飲酒於西巖以野水竹
間清秋巖酒中綠爲韻十首

雞羣媚稻梁老鶴日疎野人言隨其流故有不同
者

骨相乃封侯銅腥能使鬼文章亦可憐不直一杯水

在昔安九鼎功名照帛竹貞觀用立成一士天下足

憂國在肉食歛玉峩清班吾曹漫浪人合眼松雲間

閒居度重九昔賢愛嘉名霜菊有正色糟牀逢聖清

平生一丘壑晚墮法家流一點無俗物今年真好

秋

謝公既經世永懷東西巖翠袖亂清光輕雲點風鬟

我得秋風暇鱸魚一杯酒佳人發浩歌此樂真不朽

去年哦新詩小山黃菊中年年說秋思遠目驚高鴻

躋哉生處樂陵谷異風俗南枝吾永安笑撫西巖
綠

小飲邢巖夫家因次其韻

東風初度野梅黃醉我東山雲霧窓只今相逢莫
春月夜牀風雨翻寒江人生離合幾春事霜雪行
侵青鬢雙大梁一官且歸去酒腸雲夢吞千缸

初卜潭西新居

喬木千章畫不如白鷗煙雨到江湖誰爲求仲營

三徑竊比揚雄有一區故國興亡樹如此他年聲
利蔓難圖屋西便與秋山約莫遣歸來見白鬚

寄王仲侯

冰簟風簾千柱宮月華清浸雪芙蓉誰教驂馬三
千里好在行雲第幾峰酒市烏紗懷李白仙人鶴
斃看王恭拍浮花裏知恩否寄與新詩洗醉棕
事可發
一笑

讀疎詠之安陽對竹二詩懷家山次韻見意

短髮新霜及未侵幾年和月買泉林偶然行李對
寒碧憶得故園驚歲陰枕上秋嵐吹醉夢門前沙
鳥立清深箇中須著脩脩玉落日微風伴我吟

和子文寒食北潭

夢裏潭光翠欲流何時春水一虛舟吾廬想見扶
疎樹宦意渾如浩蕩鷗聞道西山明酒面應無外
物到睂頭別來誰唱驚人句十里珠簾有莫愁

雪晴呈玉堂諸公

雪晴松頂玉爛斑曉眼清於化鶴山欲立凍雲搜
傑句却思仙客退清班璣瑜帳底沉香火蒼荀花
中碧霧鬟喚取廣寒修月手月波千丈捲春還

和子文晚望

醉眼郊原感慨生夕陽長向古今明高人法士互
憎愛美酒空名誰重輕二頃只謀他日老五絃猶
喜晚風清因君欲賦思歸樂安得穿雲一笛橫

兵府得告將還鎮陽府推官王仲侯以書促

子命駕先寄此詩

老驥心疲十二閑
天教洗眼小江山
名園無處不
宜酒勝日有朋
方解顏老木溪光留月駐
禪房竹
徑約花關先憑樂府求風骨
或有佳人字玉環

渡混同江

十年八喚清江渡
江水江花笑我勞
老境歸心質
孤月倦游陳迹副
驚濤兩都絡繹波
神肅六合清
明斗極高湖海
小臣尸厚祿
夢尋烟雨一漁舸

初至遵化

出山風物便清和
森木如雲秀靄多
白水臨流照
疎鬢青門折柳記
柔柯重游化國驚
歲月有象豐
年占麥禾亦有黃
公酒壚在微官
自要阻山河

黃海棠

清陰不歎晚尋芳
縹緲縹緲雲翠袖
長萼綠江花
輪帶葉醉紅蜀
艷恨無香南州氣
味連三月東晉風
流共一觴
老眼寒來易愁絕
溫柔乞與醉中鄉

夜坐

吾生有幾事無涯清夜漫漫歎物華但願聞鉦似
疲馬可能粘壁作枯蠅只今雪屋重衾溼去歲梅
溪醉帽斜終得蕭閒對牀語青燈挑盡短檠花

槽聲同彦高賦

糟牀過竹春泉句

聚簷秋雨喧疎溜過竹春泉咽
暗冰門巷蕭條三尺雪琴書寥

落一龕燈
彦高詩也

他日人云吾亦云自愛淳音舍太古誰

傳清溜入南薰秋風幾共橙香注曉月曾和鶴唳

聞我欲婆娑竹林國洗空塵耳正須君

韓侯晁仲許送名酒渴心生塵以詩促之

好在銀餅秋露光藉君雲夢到枯腸解澆萬里客
愁破暫吐十年黃卷香江水苦搖梁苑夢海棠新
學漢宮粧天東四月春如許坐待白衣投醉鄉

步尋野卉

風煙草木照人明神藥奇花問識名聞道東州有
仙窟欲尋根撥學長生

癸丑歲秋郊

漫漫黃雲水清淺碧花無處亂鳴螿此生愈覺日
園樂夢裏曉山三四峯

入關宿昌平

黃塵却送入關山自斲何如二頃田記得鳴螿碧
花句蹉跎秋思又三年

秋日

風螢開闔度松陰松下飄然倦客心幾點清光照

涼夜何時遠寺得幽尋

高麗館中二首

蛤蜊風味解朝醒松頂雲凝雨不晴悄悄重簷斷
人語碧壺春筍更同傾

晚風高樹一襟清人與縹緲相照明謝女微吟有
深致海山星月總關情

西京道中

來時綠水稻如鍼歸日青梢沒鶴深莫忘共山買

田約藕花相間柳陰陰

銀州道中

小渡霜螯賤於土重巖野菊大如錢此時最憶涪翁語無酒令人意缺然

高昌館道中

雨餘巖石古苔青松裏珠璣萬葉明渺渺綠畦看鷺立深深清樾有蟬鳴

黃海棠

輕如紅豆排冰雪一拂新鷺色更奇不覺濃陰破明玉有情誰解賞離披

梅花

的皜橫枝愛老崔一尊長對畫圖開此生端有梅花分閒遠春風入手來

閒居漫興

歸田不早計歲月易云徂但要追蓮社何須賜鏡湖簿書欺俗吏繩墨守愚儒安得如嵇阮相從興

不孤

師還求歸鎮陽

春風卷甲有歡聲
漸識天公欲諱兵
節物無情新歲換
男兒易老壯心驚
落身世網癡仍絕
挂眼山光計未成
聞道恒陽似江國
一官漫學阮東平

御訂全金詩增補中州集卷六

金元好問原本

高內翰士談 三十首

士談字子文一字季默
宋韓武昭王瓊之後
宣和末任忻州戶曹
仕國朝爲翰林直學
士皇統初預宇文大
學之禍有蒙城集

行於世如云寒花貪晚日瘦竹強秋霜又
題禹廟云可憐風雨併胝苦後世山河屬
外人時人悲之子公振字特夫亦有詩名

梨花

中原節物正梨花配寒食黃昏一雨過滿地嗟狼
籍塞垣春已深花事猶寂寂朝來三月半初見一
枝白爛熳雪有香瓏鬆玉仍刻芳心點深紫嫩葉
裁輕碧懶慢不出門雙餅貯春色殷勤遮老眼避

近慰愁夕一樽對花飲况有風流客酒闌思故鄉
相顧空歎息

將赴平陽諸公祖席分韻作

灞橋波似箭南浦草如裙此夜燈前淚他年日莫
雲醉和醒一半悲與笑相分莫作陽關疊愁多不
忍聞

予所居之南下臨短壑因鑿壁開窓規爲書
室坐獲山林之趣榜曰野齋且作詩約諸友

同賦

我本麋鹿姿強服冠與簪束縛二十年夢寐遊山
林竭來古晉國官舍南城陰鑿壁取軒豁開窓舒
滯淫山光射几席野色供登臨怡顏盼庭柯明目
增遙岑草木遞榮落雲烟自浮沈玩彼物色變感
此歲月侵兀坐獨無人窺簷囀幽禽誰知城市中
闐若郊居深巷陋顏子樂地偏陶令心一室亦何
有狼籍書與琴晴暉朝徙倚皎月夜相尋欲賦畔

牢愁先爲梁父吟詩成輒自和酒熟時孤斟結茅
會有期種竹當及今日來官更忙塵埃滿衣襟莫
歸唯憊卧筋力殊不任常思返丘壑豈願紆朱金
遙知北山處猿鶴餘清音

春愁曲

壓花曉露萬珠冷金井呶啞轉纖縷寶堦寂寂苔
紋深東風搖碎湘簾影芙蓉帳暖春眠重窓外啼
鶯喚新夢推枕起來嬌翠顰一線沈烟困金鳳游

絲飛絮俱悠颺慵倚繡床春晝長郎馬不嘶芳草
暗半篩急雨飛橫塘

次韻東坡定州立春日詩

柳色看猶未梅花折已堪流年空客恨舊事與誰
談落日窺愁絕東風半醉酣雲深歸曉鴈水暖浴
春蠶從事終無愧空餐色有慙家山方杳杳官府
謾單單隱几心猶靜焚香鼻觀參語新憐鵲喜聲
鄙惡鴟貪旅迹何時定歸心不厭南佳辰近燒燭
盛事憶傳柑學業虛千卷生涯寄一庵誰能弔雙
影無月不成三

集東坡詩贈程大本

十圍便腹貯天真謀道從來不計身公業有田常
乏食陶潛無酒亦從人異同更莫疑三語饑飽終
同寓一塵待我南游載君去扁舟歸釣五湖春

曉起戲集東坡句二首

簾紋如水帳如烟一榻清風直萬錢困卧北窓呼

不起老夫風味也堪憐

清風終日自開簾吏散空庭雀噪簷午醉醒來無
一事地偏心遠似陶潛

秋興

鼓角邊城莫關河古塞秋淵明方止酒王粲亦登
樓搖蕩傷殘歲樓遲憶故丘乾坤尚傾仄吾敢歎
淹留

村行

墟落依林莽茅廬出短墻兒童避車馬父老饋壺
漿半濕田新雨猶青棗未霜逢人問豐歉一一歎
聲長

不眠

不眠披短褐曳杖出門行月近中秋白風從半夜
清亂離驚昨夢漂泊念平生淚眼依南斗難忘去
國情

秋晚書懷

肅肅霜秋晚荒荒塞日斜老松經歲葉寒菊過時
花天濶愁孤鳥江流憫斷槎有巢相喚急獨立羨
歸鴉

早起

曉起先烏鵲愁多竟不眠風霜嚴塞草星月淡秋
天落葉親攜帚垂瓶自汲泉禁門朝萬馬魂斷憶
當年

春日

遲日回輕暖東風埽積陰客愁眉上見春意柳邊
尋健犢躬耕計歸鴻去國心醉鄉如可隱會放酒
杯深

庚戌元日

舊日屠蘇飲最先而今追想尙依然故人對酒且
千里春色驚心又一年習俗天涯同爆竹風光塞
外只寒烟殘年無復功名望志在蘇君二頃田

次伯堅韻

公道向來惟白髮浮生何處用黃金東風吹散三年恨春色驚回萬里心急景只教人貌改滄溟不放酒杯深異時儻及公榮酌準擬歸來卧柳陰

次韻飲巖夫家醉中作

月中招得飲中仙草露吹風灑淨便地有溪山真可樂人如冰雪自無眠清新李白詩能勝勃率張憑理最玄功業本非吾輩事此身聊復鬪尊前

晚登遼海亭

登臨酒面灑清風竟日憑欄興未窮殘雪樓臺山向背夕陽城郭水西東客情到處身如寄別恨他時夢可通自歎不如華表鶴故鄉常在白雲中

風雨宿江上

風雨蕭蕭作莫寒半晴烟靄有無間殘紅一抹沈天日濕翠千重隔岸山短髮不羞黃葉亂寸心常羨白鷗閒濤聲午夜喧孤枕夢入瀟湘落木灣

棣棠

閒庭隨分占年芳
裊裊青枝淡淡香
流落孤臣那忍看
十分深似御袍黃

雪

蔌蔌天花落未休
寒梅疎竹共風流
江山一色三千里
酒力消時正倚樓

苦竹

密葉脩莖雨後新
肯因憔悴損天真
清如南國紉蘭客
瘦似西山採蕨人

睡起

平生心性樂疎慵
多病追歡興亦空
睡起不知春已老
一簾紅雨杏花風

楊花

來時官柳萬絲黃
去日飛毬滿路傍
我比楊花更飄蕩
楊花只是一春忙

此詩亦嘗載橋林集中然其子文集是其子特夫手錄

恐無悞收者故從之

道中

鳴鳩逐婦婦欲去燕子引雛雛不來樹底樹頭千
點雨山南山北一聲雷

丙寅刑部中二首

世事邯鄲枕歸心渭上舟釁來無朕兆意外得俘
囚忠信天堪仗清明澤自流藜羹猶火食未愧絕
糧丘

幽囚四十日坐穩穴藜床縲繼元非罪艱難已備
嘗全家音頓阻孤枕夢難忘會有相逢日牽衣話

更長

二月十一日見桃花

鳴鳩天色半陰晴竹屋松窗老寸心閉戶不知春
早晚桃花紅淺柳青深

志隱軒

家居瀟灑似江村花草侵堦水映門元亮結廬山
挂眼孔融好客酒盈樽肯教軒冕移心志未厭林
泉入夢竟我亦平生倦游客一屨無處問東屯

偶題

羨他田父老於農遠是莊西與舍東不似宦游情
味惡半生常在別離中

附書史會要士談善草書

馬御史定國

三十一首

定國字子卿荏平人唐中令周裔孫少日
志趣不凡宣政末題詩酒家壁有蘇黃不
作文章伯童蔡翻爲社稷臣之句用是得
罪亦用是得名阜昌初遊歷下亭以詩撼
齊王豫豫召與語大悅授監察御史仕至
翰林學士石鼓自唐以來無定論子卿以
字畫考之云是宇文周時所造作辨餘萬

言出入傳記引據甚明學者以比蔡正甫
燕王墓辨初學詩未有入處夢其父與方
寸白筆從是文章大進自號齋堂先生有
集傳於世

宿田舍

狂風作帚埽春陰投宿田廬話古今樽俎只如平
日事干戈方識故人心淒涼一樹梅花發迤邐千
門柳色深天子蒙塵今不返酒酣相對泣沾襟

清平道中

棘林苦苣野花黃一馬駸駸渡溧陽別墅酒旗依
古柳點溪花片落新香伏波事業空歸漢都護田
園不記唐今日清明過寒食又將書劍客他鄉

登歷下亭有感

男子當爲四海遊又攜書劍客東州烟橫北渚芰
荷晚木落南山鴻鴈秋富國桑麻連魯甸用兵形
勢接營丘傷哉不見桓公業千古遶城空水流

長相思

歷歷春陽被群木白沙淺水明如鵠結廬聊可障
雨風學道未能克耳目故人居紫翠傍枳籬日
落青山長歲云晏矣不可見望盡楚天飛鳥行

客懷

結髮游荆楚勞心惜寸陰草長春逕窄花落曉烟
深穀早惟祈雨年饑不問金三齊雖淡薄留此亦
何心

招康元質

此生亦著定如何不傍耕疇卽釣蓑北阜平蕪隨
鳥遠東湖新漲與天多詩成重墨題飛葉睡起輕
芒踏軟莎猶有客愁銷不盡風軒茶竈待君過

雨晴離開化寺

澗谷流秋水樓臺入莫寒連城遭雨積一日得泥
乾利劍青鯨室名駒白鐵鞍回頭棲隱地風樹響
珊珊

秋日書事

南山悠悠去天尺雀寒未晚爭投棘野人籬落不
勝荒溪欲絕流堆亂石小園蔬藥知有無未免杖
藜煩兩屐霧蒙甘菊細莖紫風動牽牛晚花碧鄰
舍翁歸竹几空秋天日落松窓寂小杯翻酒足自
娛間巷浮沈真可惜

讀莊子

吾讀漆園書秋水一篇足安用十萬言磊落載其

腹北風熟粗梨冷日照鴻鵠人生固多事端坐至
秉燭

雪霽

高巖旭日吐深蘋雪霽樓臺白玉京獨往南塘探
春色琵琶花下竹雞鳴

寒食

燕泥半落烏衣巷柳色全添綠綺窓且伴丁香過
寒食弄晴蝴蝶一雙雙

楊休烈村居

籬落牽牛放晚花西風吹葉滿人家閉門久雨青
苔滑時見鴛鴦下白沙

游何氏園

八尺龍蛇薜荔墻瘦松疎竹更蒼涼梅花暎水無
人見隔岸飛來片片香

四月十日遇周永昌二首

竹裏涓涓雨未晴日高窗牖受虛明數家燕雀青

雛出是處園林綠顆成貧覺酒盃真有味病思丘
壑豈無情東山舊隱許相過他日秋原看耦耕
幼時種木已巢鳶猶向花前作酒顛郭外青山招
曉出圃中明月照春眠世無蘇黃六七子天斷文
章三十年今日逢君如舊識醉持杯酌望青天

過李湘

數樹高槐散乳鴉時於缺處見黃花涼風不斷如
流水相對胡床坐日斜

雪

紅樓翠瓦不禁寒欲剪梅花去路難淨埽竹亭聊
飲酒恰如明月照金盤

懷高園南

劉又一狂士尚得韓愈知君才百劉又知者果其
誰三隨計吏貢躡履游京師文章善變化不以一
律持碧海涵萬類青天行四時去年高唐別河柳
搖風枝今年清明飲高花見辛夷茲來又幾日軍

檄忽四馳尺書無處寄相見果何期白日鬪龍蛇
黃塵笳鼓悲春風獨無憂吹花發江湄一杯送歸
雁萬里寄相思

送王松年之汶上

去去東平道飛轅不可攀地隣邾子國天近穆陵
關問俗徵前事移家卜好山溪堂醉花月春興幾
時還

香巖病中

九州四海盡行路萬戶千門非我家金彈不徒驚
燕雀春雷終待起龍蛇

題崇子中庵

羨君高節似陶潛五畝園林老不添
遜世人情雖淡薄開門秋色自清嚴
案頭黃卷香終日砌下蒼苔雨一簷
後夜中秋更應好隔窗雲木看飛蟾

郢州城西

秋江白水浪花麓墟落人歸鳥自呼
新月高城三

百雉角聲吹徹小單于

送圖南

壺觴送客柳亭東回首三齊落照中
老去厭陪新客醉興來多與古人同
戍樓藤角垂新綠山店檉花落細紅
他日詩名滿江海薺堂相見兩衰翁

秋日書事

井邊薏苡吐秋珠舍下瓜區雜芋區
世道未夷聊小隱不須辛苦著潛夫

村居五首

溪頭梅是去年花閒日初長
逕竹斜向晚孤烟三十里
不知樵唱落誰家

蠶蛹成蛾桑柘稀海棠花發照
牕扉離騷讀罷無人會
獨立溪南看夕暉

五月南風化蟪蛄野塘晚筍未成
蒲檉花落盡紅英細沙渚
鴛鴦半引雛

柿葉經霜菊在溪天寒落日見
雞棲西家有客芻新酒紅葉
蕭蕭蓋芋畦

歲莫行人竟不來空吟溪樹
覓寒梅何時消盡關山雪
收拾春風入酒杯

宣政末所作二首

蘇黃不作文章伯童蔡翻爲社
稷臣三十年來無定論到頭
姦黨是何人

山杏山桃取次開紅紅白白上
樓臺移將海底珊瑚樹乞與
人家也不栽

御訂全金詩增補中州集卷七

金元好問原本

祝太常簡

一十二首

簡字廉夫單父人宋末登科國初倅某州
仕至朝奉郎太常丞兼直史館有鳴鳴集
行於世其詩說有二云予政和丁酉任洛州

教官是時括蒼鮑慎由欽止出所注杜詩
說天王守太白守讀如狩於河陽之狩高
秋登寒山南望馬邑州馬邑州在城州界
予檢唐書志寶應元年徙馬邑州於鹽井
城欽止爲有據矣舊注馬邑屬鴈門與杜
子美作詩處全無關涉後人遂謂王源叔
謬於牽引不知源叔初不注杜詩予識其
孫彥朝彥朝不說杜詩非其大父注蓋彥

朝不學見流俗皆讀舊注因而認有可歎
可歎好問常以此問趙禮部趙云廉夫前
輩必不妄試更考之今日見吳彥高東山
集有贈李東美詩引云元祐間秘閣校對
黃本鄧忠臣字慎思余柳氏姨之夫今世
所注杜工部詩乃慎思平生究竭心力而
爲之者鏤板家標題遂以託名王源叔翰
林兩王公前後記初無一語及此注而後

全金言卷七
記又言如源叔之能文止作記於後則源叔不注杜詩爲可見矣舉世雷同無爲辨之者宣和近貴李東美有才藻善行書且喜作小楷所寫杜集精密道麗有足嘉賞爲作古詩一篇紙尾因記鄧公事後人間此其誰不疑然予少時目擊不可不識姑以告李侯非求信後人也彥高此說正與廉夫合近歲得浙本杜詩是源叔之孫祖

寧所傳前有序引備言其大父源叔未嘗注杜詩廉夫彥高益可信故併記於此廉夫詩甚工如賦雪云雪屋無寒夢油燈有細香書懷云白髮渾無賴朱顏更不回遮眼細書聊引睡扶頭濁酒最關情此類甚多

舟次丹陽

船頭東下趁晨鐘船外清霜氣暗通斷鴈聲歸烟

金詩卷七
三
靄裏孤帆影落月明中
隋河波浪千年急
梁苑池臺一半空
試問碧堤無限柳
敗條衰葉幾秋風

下第魚臺東寺

病眼逢花亦倦開
流鶯飛去悞相猜
多情却愛僧堂燕
才得春風却再來

青奴

名實於人不可誣
馬牛我亦受人呼
世間物化多難曉
誰爲此君爲此奴

雜詩二首

雨後清寒滿袖風
鴈聲南去暮雲濃
秋來杞菊能多少
欲助盤飧自不供
榴花嬌欲鬪羅裙
石竹開成碎纈文
更有戎葵亦堪愛
日烘紅臉酒初醺

虛極齋獨坐

虛齋長缺短燈檠
明月當窓夜氣清
却掩塵編時閉目
胡牀獨坐聽秋聲

相國寺鐘

寒雞縮頸未鳴晨已聽春容入夢頻未必佛徒知
警悟祇能喚起利名人

春日

鶯語相喧浩蕩春落花細點禁街塵游絲飛絮狂
隨馬遲日和風欲醉人

夏雨

電掣雷轟雨覆盆晚來枕簟頗宜人小溝一夜水

三尺便有蛙聲喧四隣

和常祖命二首

著書不得自名家卷裏蠅頭散眼花未用一杯張
翰酒正須七椀玉川茶

操筆文章學古風平生羞與腐儒同相如雖有凌
雲賦不及東方射守宮

檢旱

草樹連雲綠間黃年饑村落自荒涼晚蟬抱樹聲

聲急野菊迎人細細香

附 僞齊錄太常博士兼直史館祝簡進遷
都賦其畧云炎祚燁生闢王用闔閭錮忠
良又進國馬賦其吠堯之言大畧云蠢爾
蠻荆弗賓弗降固將突騎長驅不資一葦
之航撒烈飛渡如歷九軌而履康莊豈惟
觀兵長淮飲馬大江而止哉蓋將窮丹穴
越嶺徼車書混祝融之區聲教變卉服之

島東南一尉罔不率俾四海聞盛德而皆
徠臣萬物被潤澤而大豐美歸馬牧牛戢
戈橐矢天子垂衣裳庶民安田里豫批云
文賦正非治天下者所宜尚然以自前朝
之季上恬下嬉意國家創業力爲殘弊生
靈除禍亂圖康泰以馬爲急務而猶恐官
吏軍民多忸於舊俗未知收心於牧圉芻
秣之道此賦極陳馬之爲用使讀之者皆

知此爲至重而不可忽實有補於馬政祝
簡可減二年磨勘聊示無言不酬

張子羽 三首

子羽字叔翔東阿人馬定國薺堂集載其
師友六人其一香巖可道上人題比陽道
邊僧舍云山頭翠色僧房靜山下紅塵客
路長五月行人汗如雨豈知高處有清涼
其一鮮于可字東父蜀嘉州人從祖侁父
之武皆有名於時東父詩有小雨潤履綦
花氣襲芳襟十里青山堪布屐半篙春水

已勝舟之句其一高鷗化字圖南平原人
少有能詩聲如盤中酒影金蛇活與流虹
聚石砭之句皆奇怪不凡其一王景微字
彥美祁國文獻公溥之後贈定國詩云澗
下松杉已蔽牛溪中蘋藻可供羞故鄉未
有終焉計欲指吳山歸去休其一吳縝字
子長東平人文肅公奎之孫年三十以食
貧暫仕卽歸隱于魚山狼溪之側寄定國

云情馳夏日流目斷晚雲碧新詩從何來
遠自金馬客雄深作者意奔軼古人迹名
高四海望髮未一莖白應嗤窮途士抽簪
老泉石采蕨在南山驅牛向東陌勞生豈
不苦衣食迫晨夕膏粱無宿懷茅茨得真
適卒歲將何求一飽惟力穡訪國城石氏
云昔我訪君處樹涼炎暑收今君訪我來
城空殘雪留經時少乘輿兩至皆空投茅

全金詩卷七
八
茨隔溪上車馬度城頭不聞機杼聲但聽
溪水流向來方圓翁曾伴此中遊近聞大
梁至京塵滿衣裘相思懶歸步落日風颺
颺山居云西首魚山崦北連黃石祠崇岡
在東南我家山北陞地僻少人事終朝掩
柴扉樽酒不常得書卷聊自怡春風數日
來處處生蕨薇寸心復何累一飽良可期
當年終南人捷徑以貽譏知我無心者豈

顧悠悠辭擬淵明貧居云淒其歲云莫北
風無時休晨興倦薪水夜寐乏衾裯缺月
正裴回宿鳥頻啁啾欲無憔悴歎奈此霜
霰秋松楸脫兵火環堵且淹留閉門念袁
安守賤弔黔婁坐讀貧士詩吾乃淵明儔
溪上招王仲先云幽居復何爲冬來性成
懶柴門俯清溪寸步出亦罕今晨偶携杖
愛此晴日暖寓目隨所之行到南溪畔背

陰雪猶積向暖冰全泮
搯頤卧石上仰面
蒼崖斷泉聲何從來
乍喜兩耳換平分意
甚遲斗落勢方悍
坐來百慮忘還惜日景
短塵寰多憂虞
中林足閒散
故人戀明時
歸休苦遲緩
幅巾來何時
臨流話幽欵
叔翔亦其一也
定國謂叔翔於文章無所不能
嘗仕國朝官洛陽云

游龍門訪潛溪僧舍

入谷訪精舍
鐘聲先遠聞
陽光時翳竹
泉脉俄當門
山僧禁足久
瞑目誦微言
要知鹿臺守
但指山頭雲
策杖御栝西
幽蘭秀荆榛
風煙浩難及
薄莫花紛紛

宿寶應

重巖烟靄合
寶閣春風莫
山深月影遲
坐久識歸路
伊昔府中彥
征驂同夜駐
徂年能幾時
變滅等輕霧
禪房伴茗飲
豈待酒中趣
卧來清不寐
瘦鶴

警宿露黎明覓舊題松間宛如故

又作已復
等驚霧

壽張和滑益之

理髮秋庭趁夕陽靜中誰可共傳觴雲橫故國三
年別水遶孤村六月涼病眼只貪書味永渴心頻
夢橋奴香魚山早有終焉計少日應容解印章

朱諫議之才 一十七首

之才字師美洛西三鄉人宋崇寧間登科
入齊爲諫官坐直言黜爲泗水令尋乞閒
退寓居嵒陽因而家焉昆弟數人皆有文
名師美自號慶霖居士有霖堂集傳於世
如云魯甸分鴻影齊山入馬蹄門靜堪羅
雀書成不換鷺雨過好花紅帶潤日長嘉
樹綠移陰此類甚多子瀾字巨觀

南越行

南越太后邯鄲女皓齒明眸照蠻土珊瑚爲帳象
作床錦繖高張擊銅鼓太液池內紅芙蓉自憐謫
墮蠻煙中灞陵故人杳無耗深宮獨看南飛鴻隨
兒作帝心不願惟願西朝柏梁殿茂陵劉郎亦可
人遣郎海角來相見金猊夜燎龍涎香明珠火齊
爭煌煌番禺秦甸隔萬里今夕得遂雙鴛鴦白首
相君佩銀印干戈欲起蕭牆釁莫言女子無雄心

置酒宮中潛結陣漢家使者懦且柔纖手自欲操
霜矛孤鸞竟落老梟手可憐空奮韓千秋樓船戈
鋌師四起或出桂陽下灘水越郎追斬呂嘉頭九
郡同歸漢天子尉佗墳草幾番青霸業猶與炎洲
橫玉璽初從真定得黃屋却爲邯鄲傾五羊江連
湘浦竹嬌魂應伴湘娥哭

後薄薄酒二首

薄酒可以謀醉不必霞滋玉味麤布可以御冬不

必狐貉蒙茸醜婦可以肥家不必楚女吳娃獨夫
長夜商祚訖羲和酒淫紊天曆李白跌宕三百盃
阮籍沈湎六十日眠瓮吏部寡廉恥解貂常侍隳
法律儻使飲薄酒未見有此失秦昭狐腋幾喪首
鄭臧鶡冠貽厥咎龍裘金玦豈不哀繡衣朱襪固
無取皆緣麓衣惡不御賈禍招譏亦何有夏姬滅
兩國驪姬禍五世捧心顰眉亡夫差墮髻啼粧敗
梁冀醜婦似可惡終不至顛沛勸君飲薄衣麓娶

醜婦此樂人間最長久

薄酒麓衣吾何悲醜婦自醜吾不知道眼混圓宜
不二嫩美妍陋無殊歸瓦壘石臼斟吾酒脫粟藜
羹皆可口醉境陶然無後憂玉盃浮蛆彼何有漢
文天子猶弋綈士服麓布乃所宜要繩屐葛同一
暖霧縠冰紈徒爾爲無鹽如漆后齊桓孟光舉臼
配伯鸞古來傾城由哲婦有德乃令家國安我能
遣婦縫麓對婦飲薄傍人大笑吾不惡

寓言二首

獸有善觸邪草有能指佞獸草非有心不移本天
性前王著臣冠俾爾効端鯁如何不稱服觸指反
忠正吾欲取二物豢植列臺省一令邪佞徒奔逃
亟深屏

風雨晦時夜雞鳴有常聲霜雪枯萬幹松柏有常
青內守初已定外變終難更若人束世利浮沈無
定情俯仰効檟槩低昂甚權衡反出木鳥下徒爲

萬物靈

謝孫寺丞惠梅花

我來泗水上居與墟墓鄰彌望多棗栗礙眼皆荆
榛忽忽度歲月不知時已春朝來佳公子遺我梅
花新秀色照牕几妙香襲衣巾莽如瓦礫場驚睹
瓊瑤珍念昔客江南千樹臨江津吳儂不知貴但
與桃李倫自從墮東土夢遶江之濱歎彼和鼎實
亦復生不辰窮愁坐空山豺虎雜鳳麟此贈意不

淺難爲俗子陳

次韻東坡跋周昉所畫欠申美人

巫峽昭君有奇色毛生欲畫無由得但作東風背
面身看來已可傾人國朝來睡起鬢髮垂手如春
笋領螭蟻繡帷幽夢斷難續想像翠黛顰修眉春
光三月濃於酒燕燕雙飛鷺喚友不教膩臉露桃
花且喜腰支似楊柳君不見漢宮多病李夫人轉
面不顧君王嗔古來畫工畫意亦自足烟霧玉質

何由真

暴雨

掣電奔雷晡靄間崩騰白雨襲人寒頽山黑霧傾
濃墨倒海衝風瀉急湍勢似陽侯夸海若聲如項
籍破章邯炎歊一濯須臾耳已看天圍碧玉寬

宿閑廡

澹煙衰草慵回首晚日殘霞欲斷魂脫帽卸鞍投
逆旅蕭蕭黃葉水邊村

十月十五日夜作連枝詩四首

披衣開戶幾宵興
永夜無眠魂九升
坐覺飛霜明瓦屋
天如寒鑑月如冰

天如寒鑑月如冰
僵卧家僮喚不磨
却憶少年游太學
蕭然獨對短檠燈

蕭然獨對短檠燈
引睡翻書睡幾曾
自笑年來憂患熟
跣趺真作坐禪僧

跣趺真作坐禪僧
不學窓間故紙蠅
湛若琉璃含

寶月此中無減亦無增

卧病有感二十韻

臯蘇粲園英澤芝
紛水葉赤弁舞纖
肌黃袍緩老頰鳴
飛各有適吾獨嗟
衰蕭齒髮久已疎
又復失調燮梁肉
謝鼎俎參苓富巾
篋葵扇風未來桃
笙汗初浹呻吟和
哀蟬夢寐追化蝶
撫枕念平生世故
飽更涉弱齡負奇
志胸蜺盤燁晷夜
後傳巖訪朝待渭
濱獵荀爽歲九遷
康侯日三接功業
著鐘

金詩卷七
鼎聲名垂史牒那知事大謬舉趾得躋踰多難集
莫年百願亡一愜寒灰消寸心清淚腐雙睫坐令
孤鵬騫化作瘴鳶跼憂來復自慰人生幾萸莢呼
吸過百歲俯仰失千劫乘流須縱權遇坎卽停楫
些語不成騷商歌鼓長鈇

復用九日詩韻呈黃壽鵬

忽忽天星二十九當年曾醉瓊林酒

癸未歲登科
第適二十九

年春風射策紫垣深猶記靈和殿前柳與君雖異

千佛名出入南宮同戶牖春蠶食葉七千人看君
運筆如揮帚妙齡忠氣軼衡嵩餘子紛紛真培塿
那知晚節岱陽城白髮蒼顏兩閑叟君材有如萬
斛舟顧我碌碌才筭斗時窮壯士或飯牛遇合封
侯起屠狗東臯有田供王賦天寒且輟扶犁手寂
寥圭竇對書冊火冷燈青夜方久先生乘興肯相
過亦有青錢沽玉友

七夕長短言

牛不可以服箱女不可以成章其名則然實豈爾
政如箕斗難挹揚河漢特水象安有波浪爲津航
惟鵲乃巢居詎能上天構橋梁星經有躔次東西
永相望今夕復何夕乃謂合并如鸞鳳一人唱誕
惑萬世浪令兒女爭猖狂瓠牛載盤何等秩金梭
擲地殊荒唐吾命有貴賤吾性本直方探官與乞
巧是豈吾所臧何如舉酒邀明月更遣清風屏炎
熱星光落盞黃金空露華糝袂真珠滑我方幕天
席地醉兀兀癡牛駮女知何物

水月有興

明月落湖水天淵體俱一浩蕩碧琉璃奩此寒玉
璧微風觸湖波合散作六七浮光逐水紋金蛇勢
盤詰人心湛寂初與月同清質外累一汨之萬態
紛殊迹因知養心者無爲風浪失

劉內翰著

二十四首

著字鵬南舒州皖城人宣政末登進士第
歸朝預銓調碌碌州縣年六十餘始入翰
林充修撰出守武遂終于忻州刺史皖城
有玉照鄉旣老號玉照老人示不忘本云

次韻彥高卽事

福威看九落筆削在麟經中道亡三鑑危時憶九
齡網羅無處避輦鼓不堪聽身遠遼陽渡心懷峴

首亭脫巾頭半白
傾蓋眼誰青
斷鴈西風急
潸然涕泗零

順安辭呈趙使君二首

太平時世屢豐年
勝事空聞父老傳
郭外桑麻知幾頃
船頭魚蟹不論錢

六朝興廢渡河年
舊國歸來更黯然
八月邊城山未雪
蘆花藉藉已漫天

次韻王子慎玉田道中一首兼呈韓公美閣

老

東晉風流屬子猷
開元峭直讓韓休
絲綸對掌驚三雋
尊酒更酬失四愁
古道陰陰槐樹老
歸鴻杳杳荻花秋
浩然詩思天涯遠
月滿江南小謝樓

出榆關

羽檄中原滿
萍流四海間
少時過桂嶺
壯歲出榆關
奇禍心如折
羈愁鬢已斑
楚纍千萬億
知有幾人還

渡遼

身隔遼東渡心懷冀北羣會歸蘇屬國却憶范將
軍風陣橫秋鴈雷聲吼夜蚊方言莫相笑唐梵本
殊分

至日

亂離南國忽經年一線愁添未死前心折靈臺候
雲物眼看東海變桑田燕巢幕上終非計雉畜樊
中政可憐安得絕雲行九萬却騎鯨背上青天

次韻彥高莫春書事

戊申歲

平生漫浪老清暉却埽丘園屬少微世亂傷心青
眼舊天涯流淚白雲飛羈愁只憶中山酒貧病長
懸子夏衣澤畔行吟誰念我祇應形影自相依

寄題張浩然松雪樓

入座山光秀玉柯岸巾絕景意如何瘦來豈為寒
松句和寡還驚白雪歌地近雲煙來鶴駕簷高星
斗瀉銀河懸知老子登臨處渺渺滄波月色多

次韻彥高占雪
天秋鼓南風雲海飄莫雪三春猶互寒九夏那苦
熱土圭測中氣嘗聞先儒說窮髮多異宜泥古誠
亦拙吳侯擅六藝名宦端不屑晚歲登泰山蚤已
探禹穴千歲可坐致不待數旬月重陰畏坎陷五
陽欣夬決君子方履霜渠肯蹈覆轍雞猪與魚蒜
幸可充朝餽

枕上言懷

九土將分裂中原政擾攘孰爲真漢相却憶假齊
王晉室遷神鼎梁園作戰場可憐羈客夢夜夜在
家鄉

再和彥高

否泰由來在歲星誰聽叩角作商聲一朝漢魏成
今古百口燕秦隔死生雉堞僅能逃病婦鴈書猶
記作團兄雪雲埋盡遼西路有酒如淮奈此情

聞鴈

千里寒雲卷朔風當軒月午鴈書空煩君爲報江
南客顛顛頓遼東更向東

閨情二絕

巳酉
歲

天邊北斗又回春愁絕龍沙任酒醺萬里巫山歸
夢斷不知何處覓行雲

蕙帳金爐冷篆烟故山春草幾芊芊只今唯有瀟
湘月萬里相隨照不眠

過白溝趨順安

萬折狂瀾肯倒流歸心夢寐在東周平生快意君
知否今日驅車過白溝

題御城寺壁

一徑埋雲草樹荒石麟蒼蘚卧田桑漢家陵闕今
何在洛水嵩山滿夕陽

月夜汎舟

浮世渾如出岫雲南朝詞客北朝臣傳郵擾擾無
虛日吏俗區區老却人入眼青山看不厭傍船白

鷺自相親舉杯更欲邀明月暫向堯封作逸民

病中寄楚卿

月滿江樓午夜鐘多情多病一衰翁行雲不道無
行雨只恐相逢是夢中

送客亭

十年羈旅鬢成絲千里淮山信息稀送盡長亭短
亭客且看莊舄幾時歸

病中言懷呈韓給事

潦倒淮山客金臺五見秋退飛嗟宋鷁畏暑甚吳
牛問疾憐摩詰分曹類子猷自慙無補報只合隱
林丘

伯堅惠新茶綠橘香味郁然便如一到江湖
之上戲作小詩二首

建溪玉餅號無雙雙井爲奴日鑄降忽聽松風翻
蟹眼却疑春雪落寒江

黃苞猶帶洞庭霜翠袖傳看綠葉香何待封題三

百顆只今詩思滿江鄉

文季侍郎得綠萼香梅子文待制有詩輒亦

同賦

一枝綠萼冠羣芳瀟灑猶疑楚岸傍香骨瘦來冰
蓋細夢魂清處月波涼賡酬便合成千首醒醉寧
須計百觴橫玉叫雲吹不盡只教今古洗離腸

施內翰宜生

四首

補三首

宜生字明望浦城人宣和末爲潁州教官
仕齊仕國朝官至翰林學士自號三住老
人有集行於世賦柳云朱門處處臨官道
流水年年遶禁宮草書云臨池翕忽雲霧
集舞劍浩蕩波濤翻山谷草書云行所當
行止當止錯亂中間有條理意溢毫搖手
不知心自書空不書紙社日云濁澗迴湍

激青烟弄晚暉緣隨春酒熟分與故山違
社鼓喧林莽孤城隱翠微山花羞未發燕
子喜先歸又云割少談諧語分均宰制功
靈祇依古樹醉叟泥村童萬里開耕稼三
時順雨風行春從此樂著意酒杯中初在
潁州日從趙德麟游頗得蘇門沾丐云

補金史宜生爲宋潁州教授以罪北走海
陵召爲翰林直學士遷翰林侍講學士爲

宋正旦使宜生自以得罪北走耻見宋人
力辭不許宋命張燾館之都亭因間以首
丘諷之宜生顧其价不在旁爲度語曰今
日北風甚勁又取几間筆扣之曰筆來筆
來於是宋始徹其副使耶律闢離刺使還
以聞坐是烹死先是宜生困於場屋遇僧
善風鑑謂之曰子面有權骨可公可卿而
視子身之毛皆逆上且覆腕必有以合乎

此而後可貴也宜生聞其言大喜竟從范
汝爲於建劍已而汝爲敗變服爲傭傭泰
之吳翁家三年翁異之一日屏人詰其姓
名宜生日我服傭事唯謹主人乃亦寘疑
耶翁固詰之則請其故翁曰日者燕客執
事咸餒而汝獨遜諸儕且撤器有歎聲是
以識汝非真傭也宜生遂告之故翁贖之
金夜濟淮以歸試一日獲熊三十六賦擢

第一其後竟如僧言

柳

魏王堤暗雨垂垂還似春殘欲別時傳語西風且
停待黛殘黃淺不禁吹

無題

唱得新翻穩貼腔阿誰能得肯雙雙天寧寺裏尊
前月分擘清寒入小窓

盆池

盆池漱灑蔭芭蕉點水圓荷未出條分得江湖好
風景斷雲飛去晚蕭蕭

平陽書事

春寒窈窈透春衣沿路看花緩轡歸穿過水雲深
密處馬前蝴蝶作團飛

題平山落鴈

塞鴻橫天三兩行欲下未下先悠揚平田到處菰
蒲美託身何必來瀟湘

題都亭驛

江梅的皜未全開老倦無心上將臺人在江南望
江北斷鴻聲裏送潮來

含笑花

百步清香透玉肌滿堂皓齒轉明眉褰帷跛客相
迎處射雉春風得意時

附貴耳集施宜生改名方人也入大金會
爲奉使來館伴因語三十六熊賦云雲屯

八百萬騎以八百萬騎對三十六熊何其鮮哉宜生語塞大抵南北二使皆不深書司射所載熊卽侯也非獸也

附金詩紀事案遼史興宗重熙五年九月癸巳獵黃花山獲熊三十六冬十月壬子御元和殿以日射三十六熊賦試進士於廷則此賦乃遼時舊題海陵朝適有此相同之事故卽用以試士耳

附晦庵詩話龍泉尉施慶之常舉宜生十數詩內入使時題都亭驛云云

附癸辛雜識汴梁普賢洞記石碑甚雅金皇統四年四月一日奉議大夫行臺吏部郎中飛騎尉施宜生撰并書所謂方人也者後爲金相字步驟東坡

御訂全金詩增補中州集卷八

金元好問原本

大家二人

承旨党懷英 六十五首 補二首

公諱懷英字世傑宋太尉進之十一代孫

父純睦自馮翊來以從仕郎為秦安軍錄

全金詩卷八

生金詩卷八
事參軍卒官妻子不能歸遂爲奉符人公
之在孕也太夫人夢道士吳筠來託宿及
公生儀觀秀整如神仙然少穎悟日授千
餘言師亳社劉巖老濟南辛幼安其同舍
生也嘗試東府取解魁是後困於名場遂
不以世務嬰懷放浪山水閒詩酒自娛簞
瓢屢空晏如也夫人石氏徂徠先生之後
亦能安貧守分旣久鄉豪傑有知公者稍

料理之大定十年擢進士甲科調成陽軍
事判官汝陰令入爲史館編修應奉翰林
學士出爲大定軍節度使爲政寬簡不言
而人化名爲翰林學士承旨致仕大安三
年九月年七十八終於家是夕有大星殞
於所居之堂衆驚視之而公已逝矣諡曰
文獻禮部閒閒公墓誌云公之文似歐公
不爲尖新奇險之語詩似陶謝奄有魏晉

篆籀入神李陽冰之後一人而已嘗謂唐人韓蔡不通字學八分自篆籀中來故公書上軋鍾蔡其下不論也小楷如虞褚亦當為中朝第一書法以魯公為正柳誠懸以下不論也古人名一藝而公獨兼之可謂全矣

皇叔永蹈伏誅公作詔云天下一家詎可窺於神器公族三宥卒莫追於常刑非忘本根骨肉之情蓋為宗社安危之計亦由涼德有失睦親乃於閒歲之中連致逆謀之起思以義掩至於重典之亟行天高聽卑殆非此心之得已與言

及此慨歎奚窮論者謂公之制誥百年以來亦當為第一閒閒公作碑偶不及此故表出之

補歸潛志党承旨懷英與辛尚書棄疾俱山東人少同舍屬金國初遭亂俱在兵閒辛一旦率數千騎南渡顯於宋党在北方擢第入翰林有名為一時文字宗主二公雖所取不同皆有功業寵榮視前朝陶穀韓熙載亦相況也後辛退閒有詞鷓鴣天

全金詩卷八
三
云壯歲旌旗擁萬夫錦韉突騎渡江初燕
兵夜捉銀胡象漢箭朝飛金僕姑思往事
歎今吾春風不染白髭鬚都將萬字平戎
策換得東郊種樹書蓋紀其少時事也

補金史懷英與郝侯充遼史刊修官應奉
翰林文字移刺益趙渢等七人爲編修官
凡民間遼時碑銘墓誌及諸家文集或記
憶遼時舊事悉送官是時章宗初卽位好

尚文辭旁求文學之士以備侍從謂宰臣
曰翰林缺人如之何張汝霖對曰郝侯能
屬文宦業亦佳上曰近日制詔唯党懷英
最善移刺履進曰進士擢第後更不讀書
近日始知爲學矣上曰近日進士甚減裂
唐書中事亦多不知朕殆不喜上謂宰臣
曰郝侯賦詩頗佳舊時劉迎能之李晏不
及也明昌元年懷英再遷國子祭酒六年

有事於南郊懷英攝中書侍郎讀祝冊上
日讀冊至朕名聲微下雖日尊君然在郊
廟禮非所宜當平讀之泰和元年增修遼
史官三員詔分紀志列傳刊修官有改除
者以書自隨久之懷英致仕章宗詔直學
士陳大任繼成遼史云

附趙秉文題竹溪黃山書竹溪先生篆第
一八分次之正書又次之皆當爲本朝第

一黃山先生擘窠大字體兼顏蘇畫畫雄
秀當在石曼卿之上草書如行雲流水當
在蘇才翁黃魯直伯仲間非但不愧之而
已

穆陵道中二首

沂山一何高羣峰鬱孱顏我行問遺老云此小泰
山望秩有常祀其神號東安草荒穆妃墳雨剝漢
武壇神仙果何在可想不可攀千年等一昔俯仰

悲人寰東望蓬萊宮咫尺滄波間

重山復峻嶺溪路宛盤盤流水滑無聲暗瀉溪石
間岸草淒以碧鮮葩耀紅丹高雲映朝日流景青
林端我行屬朱夏欲渴不得閒山中有佳人風生
松桂寒

瓊花木后土像

皇媧化萬象賦受無奇偏胡爲墮愛境亦爲尤物
牽煌煌靈祠花玉蘂冠春妍婉如傾國姝獨立江

湖邊顧惜怨奪移含秀梁宮烟青黃竟自寇始信
擁腫全珍材歸好事肌理緻且堅琢刻方寸餘遺
像規汾壻願言稅靈馭要復安所憐神游妙難詰
豈以大小懸槐根開夢國橘實游碁仙靜想寶龕
中坐納東南天況有大者存指顧超八埏

君錫生子四月八日

左君錫
北名士

堂前種護憂可忘不如生兒喜殊常嘔啞啼笑彩
衣側滿堂和氣生嘉祥燕寢香凝佳夢兆與佛同

生佛親抱我來初見出錦綉肌肉照人眉宇好世
閒兒子空紛紛如君此兒真慰人薊山東盤出英
秀政與德門宜子孫天馬駒海鶴子氣骨初成便
超異籟雲冲霄從此始

立春

水結東溪凍未漪風凌枯木怒猶威不知春力來
多少便有青蠅負暖飛

端午日照道中

幾年客舍逢端午今日東行復海隅三歲已無平
老艾一杯聊作辟愁符

夏日道出天封寺

疊澗重岡掩復開鳥啼人寂路縈回微涼暫逐行
雲過細雨俄從遠樹來世事自嗟吾老矣山僧那
識興悠哉婆娑十畝溪橋櫟藉汝清陰感不材

龍池春興

三十餘年惜別心重來獨興此登臨佳人何在莫

雲合遊子不歸春草深曲檻凭欄花冪冪扁舟繫
岸柳陰陰避人白鳥忽驚去雙影飛翻明翠岑

宿宣灣

清潁去無極悠悠楚甸深人家半臨水村徑曲穿
林積雨猶行潦荒煙易夕陰夜涼淮浦月寂寞照
邊心

黃彌守畫吳江新霽圖

江雲卷宿雨江風散晨烟山光烟雨潤欲滴影墮
江水空明間修蛾新粧翠連娟下拂塵鏡窺明蠟
漁舟來何許觸破青茫然中流水肥魚逆上受網
應有松鱸鮮藉問張季鷹西風幾時還魚郎理網
喚不應但見水碧江涵天如何塵埃中眼界有許
寬道人胸次陂萬頃爲寫此境清而妍蒼崖無塵
樹影寒直欲坐我苔磯邊我家竹溪陰小艇橫清
漣異時赤脚踏兩舷不應尚作披圖看

雪中四首

詩人固多貧深居隱茅蓬一夕忽富貴獨卧瓊瑤
宮夢破窓明虛開門雪迷空蕭然視四壁還與嚮
也同閉門撚鬚坐愈覺生理窮天公巧相幻要我
齊窮通衝寒起沽酒一洗芥蒂胸

翻翻雪中鴉飛鳴覓遺粟雪深不可求遶屋啄寒
玉顧我如鴟鳶多儲有餘肉我亦生理拙凍卧僵
雪屋日午甌無烟饑吟攪空腹豈不知屠沽肥甘
隨取足幸待春雪消吾猶多杞菊

歲晏苦風雪曠野寒崢嶸滋薪燒枯棘距刺相拏
撐濃烟久伊鬱微焰方晶熒津津膏乳漲中有蚯
蚓鳴蓬蒿掇快炬倏作飛灰輕餘暖未及愜睫淚
先已盈幸有鄰家酒時澆肌粟平

歲晏雪盈尺農夫倍欣然不作祁寒怨應知有豐
年笑我寄一室歸耕無寸田無田吾不憂飲啄當
問天我看多田翁租賦常逋懸低頭負呵責顏色
慘可憐不如拾滯穗行歌兩無牽

雪

寶花天雨曉紛紛佛界粧嚴盡白銀待臘風雲初
接勢犯寒槽麴若為神園中芳草誰能賦江上梅
花獨自春半臂騎驢得佳句九原誰喚灞陵人

蟬

槁壤陰潛罷轉丸飄飄便作飲風仙幽叢何處拳
枯蛻別樹還來續斷絃小院日長清夢覺空庭人
靜綠陰圓無情物化誰能料獨撥羈懷一慨然

漁村詩話圖

江村清境皆畫本畫裏更傳詩語工漁父自醒還
自醉不知身在畫圖中

曉雲次子端韻

灤溪經雨浪生花曉碧翻光漾曉霞川上風烟無
定態盡供新意與詩家

送高智叔歸濟南

已作西溪約還為汶上行漂流知分際會合見平

生旅枕勞歸夢家山入去程空齋桃李月寂寞照
清明

日照道中

路轉清溪樹蔚然解鞍坐榻午陰圓避人鷗鳥驚
飛盡時有遊魚弄柳綿

夜發蔡口

落霞墮秋水浮光照船明孤程發晚泊倦楫搖天
星藹藹野烟合翛翛水風生遠浦浩渺漭微波澹

彭觥畸鳥有時起幽蟲亦宵征懷役歎獨邁感物
傷旅情夜久月窺席忼慨心未平

西湖晚菊

重湖滙城曲佳菊被水涯高寒逼素秋無人自芳
菲鮮飈散幽馥晴露墮餘滋蹊荒綠苔合采采歎
後時古餅貯清泚芳樽前塵霏遠懷淵明賢獨往
誰與期裴徊東籬月歲晏有餘悲

西湖芙蓉

林飈振危柯野露委荒蔓孤芳爲誰妍一笑聊自
獻明妝炫朝麗醉態羞晚困脉脉懷春情悄悄驚
愁怨豈無桃李媒不嫁惜嬋媛悠哉清霜莫共抱
蘭菊恨

浪溪別吳安雅

浪音郎

浪水清且白頻年照行役褰裳涉微波微波去無
極悠悠溪上山送我往復還與君臨水別幽恨寄
山閒

奉使行高郵道中二首

野雪來無際風檣岸轉迷潮吞淮澤小雲抱楚天
低蹉踏船鳴浪聯翩路牽泥林鳥亦驚起夜半傷
人啼

細雪吹仍急凝雲凍未開牽閒時掠水帆飽不依
桅岸引枯蒲去天將遠樹來行舟避龍節處處隱
漁隈

孤鴈集句

萬里銜蘆至寒空半有無踪分沙岸靜聲入塞垣
孤影早衝關月飛高望海隅不知天外侶何處下
平蕪

黃菊集句

九月欲將盡鮮鮮金作堆遶籬殘豔密擁鼻細香
來五色中偏貴群花落始開可憐陶靖節共此一
傾杯

金山

我從渡淮涉高郵雪風連日吹行舟維揚地西闖
夜色星月隱見邊城樓晴光破曉射瓜步照耀玉
宇開瓊洲馮夷收威浪妥帖容我一到金山頭金
山勝槩冠吳楚萬礎蟠峙江中流平生夢寐不到
處乃以王事從私遊鍾山雨花落眼底海門鶴崖
波際浮川開林闔望不極但見遠色明輕鷗風烟
渺漭異吾土行役有程難久留一杯未舉帆影轉
已看浙樹稍旗旒

趙飛燕寫真

昭陽宮裏千蛾眉中有一人輕欲飛姊妹夤緣特
新寵六宮鉛粉無光輝春回太液花如繡花底輕
風扶翠袖君恩不許作飛仙襞積宮裙留淺皺君
王貪宴溫柔鄉木門不省搖倉琅避風臺成畧今
古空使遺妬驚霓裳當年傾城復傾國誰寫餘妍
入丹碧背燈擁髻一潛然不應尚有樊通德

村齋遣事

人生天地真蘧廬物外擾擾吾何須與其羈弄齊
轅駒豈若飲齧隨駘駘不知掉尾忘江湖响响濡
沫胡爲乎誰念挾卷矜村墟磨丹黝圍樵蘇申
鞭示箠嚴範模矍如狙翁調衆狙爾雅細碎編蟲
魚辭嚴義密字見疎烘齋睥睨音語麤諷誦誰敢
忘須臾萬中有一差錙銖伊啞坐使爲呻呼咄哉
倡言口囁嚅等爲兒戲夫何殊霜風入戶寒割膚
生薪槎牙供燎爐漫漫滋煙迷四隅白鶴日見黔

如烏此閒縱樂能何如其誰相與歌歸歟投籠嗟
我自摯拘垂翅更待窮年徂

和張德遠伐松之什

社櫟賦散材乃遭匠石嗤高梧中宮徵不能保孫
枝全傷隨用否理固不可移堂堂十八公端勁出
天姿蟠根藉餘潤茂鬱清溪湄雨師夜失律偶此
遺神螭煙鱗漬寒雨霧鬣明朝曦騰拏困愈壯偃
蹇僵不疲未能走沆漭聊與草木嬉長風動頭角

吟嘯舒鬱伊塵埃詎能久雷電會有時昨宵卧溪
月老影閒橫欹天明竟不舉俯仰益怪奇拏拳攀
半崖渴喙吞清漪希珍價不售復病樵柯危材高
輒爾耳嗤彼造化兒樛枝飽霜雪遽與蓬蒿衰孤
標挽萬牛未爲廊廟知窈窕桃李春奈爾千歲期
枯桑豈自賈取敗以老龜茲非爨下材梁棟終見
施長短歸自然勿爲鳧鶴悲

題獐猿圖

雲山空岡阜重榭葉半濕新霜紅溪猿得意適其
適閒攀靜挂晴光中孤麈何從來寂歷野竹風舉
頭相視不相測昂藏却立如癡童鯤鵬負雲天斥
鷃處蒿蓬萬生所樂自不同恻然胡爲之二蟲

和濟倅劉公傷秋

川流爲瀦鉅野濶水色天容兩開豁山隨水遠勢
奔驚駿馬西來銜轡脫山前雲木散不收坐看木
末來歸舟秋容澄明納萬象畫本寂默橫雙眸謫

仙曾來釣煙磧想見夕陽寒影隻騎鯨去作汗漫
遊只有荒臺壓澄碧臺邊昨夜西風來倦遊羈宦
心悠哉豈無瓊艘百柁載春色是中可以忘形骸
官居得秋況不惡高吟何遽悲搖落君不見中郎
詩翰憶湖山秋色正滿連雲閣

題春雲出谷圖

春雲乍出山有無春雲已去春山孤山光空濛不
可寫正要雲氣相縈紆山吞雲吐變明晦半與巖

谷生朝晡輕林蕭蕭暗溪樹餘影漠漠開樵居舟
人艤棹並沙尾坐看縹緲搖空虛巧分天趣出畫
外韻遠不與丹青俱今人重古不知畫但愛屋漏
烟煤汙惜哉東坡不及見此本詩中獨有疊嶂煙

江圖

輕林蕭蕭一作輕陰霏霏

新泰縣環翠亭

官居坐官府不見青山青閒來亭上看青山遶重
城左見青山縱右見青山橫具教浮虛碧崢嶸群

峯連娟相繚縈縣庭無事苔蘚生獨携珍琴寫溪
聲琴聲鏘鏘激虛亭罷琴舉酒招山英山英莫相
嘲我雖朝市如林垞客有山中來聞說令尹清山
英異時合有情周遮不放公馬行

喜雨

山雲駛如驅山雨沛如傾幽人夢初醒卧聽簷溜
聲雷霆怒相搏似與陰陽爭蛟龍久何蟠始此幽
蟄驚餘花曉猶落竟日方破晴明朝東臯望照眼

全金言卷八
生意明焦枯被沾濡相與迴春榮忻然野桃李新
綠棲殘英漸漸麥壠翠溜溜溪流清蛙鳥亦解喜
飛沈互喧鳴萬物皆得時棲遲感吾生直應挂儒
冠便逐春農耕

睡覺門外月色如晝霜風過寥然成聲作一

絕

老木經霜衆竅空月明深夜響秋風始知天籟非
人籟吹萬由來果不同

題張維中華山圖

苾珠散遺胄我姓出馮翊空聞華山名未始見顏
色三峯擢觚稜經眼但石刻那知玉井蓮香落清
渭北巔崖劃變轉勢走關輔窄豈無愛山人不解
傅粉墨多才曲江喬公暇日招揖歸裝貯新圖尚
帶烟霧濕明窓一傳玩恍若到鄉國我生隨宦遊
久作東南客有田秦山下繞屋皆泉石懷恩戀官
廩老大歸未得況復秦川遙便恐此生隔峻嶒蒼

烟面只許畫中識詩成持送君想像三歎息

題馬賁畫鷓鴣圖

雙眠雙浴水平溪共看秋光卧兩堤誰信瀟湘有
孤鴈冷沙寒葦不成棲

書因叔北軒壁

生涯自分老林泉欲止還行信有緣未許綸竿歸
醉手且教烟水入吟鞭雲山聊欲追聲叟風腋何
妨借玉川獨卧北軒元不寐竹間寒雨夜琅然

和元卿郊行

馬駛車驅起路塵傍山陰翳作春溫東風欲放萌
芽動已有疲牛嚙燒痕

世華將有登州之行作是詩以送之

少陵兄弟益三人坡老相知只卯君五畝有期將
共隱一樽何易便輕分秋鴻渺渺看孤往夜雨瀟
瀟忍獨聞他日書來問無恙我應深釣竹溪雲

澠密道中懷古

十二全齊勢興亡俯仰中地傾濼水北山斷穆陵
東破塚餘殘甕荒蹊足轉蓬燕齊舊懸隔不接馬
牛風

過棠梨溝

地僻人烟少山深澗谷重坡陀下長坂迤邐失諸
峯問俗知懷土聽歌識相春幾家茅屋外田畝自
衡從

响山驛亭阻雨

東海地名蒼梧舊說云此島
自蒼梧浮來又州有景疏樓

脫葉蕭蕭山木稠連檣飄汎海蓬秋浪回响島馮
夷舞雲暗蒼梧帝子愁欲往未行淹僕馬乍來還
去羨鷓鴣景疏樓下無邊水暫濯塵纓可自由

弔石曼卿

曼卿嘗通守响山遣人以泥封桃
李核彈之巖石閒其後花開滿山

又嘗攜妓飲山之石室
閒鳴琴為冰車鐵馬聲

城頭山色翠玲瓏尚憶清狂四飲翁鐵馬冰車斷
遺響桃花石室自春風平生詩價千鈞重身後仙
遊一夢空想見蓬萊水清淺芙蓉城闕五雲中

响山道中三首

二年三到水雲鄉
瘦馬凌兢怯路長
野雪未乾春未雨
落鳶飛起暗塵黃

吳歌楚語海山閒
織葦苫菰便自安
已作稻塍猶未種
小溝流澁水車乾

海路東南萬壑傾
青山孤起壓重城
驛亭春半餘寒雪
墻角無人草自生

應制粉紅雙頭牡丹二首

卿雲分瑞兩嫣然
鏡裏粧成穀雨天
曉日倚闌閒妬豔
春風拾翠兩駢肩
水南水北何曾見
桃葉桃根本自仙
夢想沈香亭北檻
畧修花譜記芳妍
春意應嫌芍藥遲
一枝分秀伴雙蕤
並肩翠袖初酣酒
對鏡紅粧欲鬪奇
上苑風烟工獻巧
中天雨露本無私
更看散作人間瑞
萬里黃雲麥兩岐

次文孺韻

病眼花生紙羈懷
棘遶墻挑燈簷溜急
到枕漏聲

長響徹雞埒曙寒迎鴈背霜淒涼三境菊無夢到
壺觴好問按此詩是貢院中唱和
故有花生紙棘遶墻之句

白莊道中

暖風遲日弄春晴渾似龍眠畫裏行沙路半隨堤
尾曲幾家桃李鶉鴉鳴

花品

翠裙襞積破黃薇新樣丁香結玉糝最愛東風木
芍藥淡紅深紫兩相宜

書扇後

便面團圞字點鴉天風吹墮委塵沙燕泥庭草爭
工拙何似當年陌上花

送崔深道東歸

君從鬱葱幾時來鬱葱山色空崔嵬白雲已自動
歸意蠨蛸蚺蟻況可懷薰風濁酒非莓苔那知空
齋響蚊雷酒酣臨風解相憶喚取玉笛傳清哀

和道彥至

山光凝黛水浮空地僻偏宜叔夜慵尚喜年登更
冬暖敢論人厄與天窮君方有志三重浪我已無
心萬里風擬葺小園師老圃綠畦春溜引連筒

楚清之畫樂天小娃撐小艇偷採白蓮回不

解藏蹤跡浮萍一道開詩因題其後

樂天歸卧湖山邊閒買池塘娛莫年小蠻已老樊
素去心地玲瓏如白蓮室中誰遣散花天故點禪
衣香破禪鴛鴦爲報竊花處題詩要戲小嬋娟紅

妝秋水照明蠲清之粉本清且妍道人無心被花
惱對畫作詩真適然君不見元亮投名蓮社裏不
妨更賦閒情篇

寄賈因叔

鶉居穀食兩迷陽四十猶貪桂子香石汶爲君拋
水月憲陵回首見冰霜蟲魚細碎成書癖荆棘崢
嶸失醉鄉舉白北軒真一夢竹閒猶記雨浪浪

題大理評事王元老雙橘堂

朱橋復朱橋傳分包貢實煌煌中堂榜奇畫照公
堂前護草碧公今致養豐祿食更取蠻珍奉顏色
舉觴一笑三千秋坐看諸孫索梨栗

宿舊縣四更而歸道中撫所見作行路難

三星排空山月明思歸客子夜半行單衣短褐風
淒清響踏黃葉棲禽驚忽忽曉轉沙岸側枯蓼寒
蘆鳴索率山月欲隨山烟黑前途無人脚無力行
路難堪歎息

途中

壬辰正月

平明發郊墟獨步踰蹊蹠引領發前程日出烟未
滅林迴鳥始喧麥短牛已噉春陽氣未壯道左尚
殘雪長風拂歸袂凜欲變冬冽指凍僵不拳膠凝
仍欲折而我竟何事犯此寒正切修途去未幾行
意先已繭安得兩翼生高飛度林樾

徐茂宗蝸舍

萬生擾擾安其安鸞鳩不羨鵬飛搏端知扶搖上

金鑑詩卷八
九萬無異跳躍蓬蒿間是身江湖一漂粟身外紛
紛皆外物一塵儻可容所寓何用渠渠作高屋知
君從道由心成昔焉忘俗今忘形物來弭角不知
競觸蠻血戰良虛名我夢敲門訪君舍舍小不容
相對話覺來驚見壁間蝸俯仰人間真物化

壬辰二月六日夜夢作一絕句其詞曰矯冗
連天花春風動光華人眠不知眠我佩絳紅
霞夢中自以爲奇絕覺而思之不能自曉故

作是詩以紀之

夢中作詩真何詩夢中自謂清且奇覺來反覆深
諷味字偏句異誠難知豈非夢語本真語無乃造
物爲予嬉君不見莊周古達士栩栩尚作蝴蝶飛
我生開眼尚如此況在合眼夫何疑

謁孔林一首

魯國遺蹤墮渺茫獨餘林廟壓城荒梅梁分曙霞
棲影松壩回春月駐光老檜曾霑周雨露斷碑猶

是漢文章不須更問傳家遠泰岱參天汶泗長

題王廣道環翠堂

誅茅結構畧三楹顧揖青山共落成一逕宛如通
輞口廿岑何用詫南城清風枕簟人間世黃卷聖
賢天下名只恐山靈留不得莫年合起爲蒼生

附趙秉文竹溪篆政李監之篆蔡中郎之
八分虞永興之小楷陶謝之詩六一公之
文妙絕一世公兼而有之抑可謂全矣後

數百年不幸文字散落獨此篆存亦足以
知予言之不妄

附元胡祗適題党懷英八分書文章與時
高下唐不如漢漢不如三代党竹溪在金
朝爲第一流方之梁鵠蔡邕鍾繇一何遼
哉僅能得韓擇木之髣髴耳

附趙秉文翰林學士承旨文獻党公碑先
秦古文篆籀淳古簡嚴後世邈乎不可及

已漢之文章溫淳深厚如折枯繇以爲明
堂之楹駕馭驥以遵五達之衢不憂傾覆
使人曉然知治道之歸韓文公之文汪洋
大肆如長江大河渾浩運轉不見涯涘使
人愕然不敢睨視歐陽公之文如春風和
氣鼓舞動盪了無痕迹使人讀之疊疊不
厭凡此皆文章正宗也至於書亦然秦相
李監之篆漢魏之八分虞褚魯公之楷見

者莫不歛衽而敬其下作者如零珠片玉
非無可喜要非書法之正也本朝百餘年
閒以文章先稱者皇統閒宇文公大定閒
無可蔡公明昌閒則党公於時趙黃山王
黃華俱以詩翰名世至論得古人之正脉
者猶以公爲稱首公諱懷英字世傑泰安
州奉符人少穎悟日誦千餘言及壯以文
名天下書法上軋鍾蔡小楷如虞褚當爲

中朝第一古人名一藝公獨兼之可謂全
矣銘曰文章非能爲之爲工乃不能不爲
之爲工也非要之必奇要之不得不然之
爲奇也譬如山水之狀烟雲之姿風鼓石
激然後千變萬化不可端倪此先生之文
與先生之詩也至於篆籀之妙後數百歲
復有一陽冰則不可知後數百歲無復一
陽冰則書止於斯噫

附元王惲跋竹溪所題東坡墨戲後竹溪
書所見多矣未有若此帖之真楷蕭散者
大似虞中舍諫獵奏狀閒以側筆學坡之
媚耳乃知公當大定明昌閒不只以篆籀
獨步於玉堂金馬矣輔之韞櫝愛玩亦醉
翁之意也可謂真知賞音者哉

附太平清話党懷英善屬文尤工篆籀當
時稱爲第一今可見者闕里杏壇二大字


岱祠碑額魯兩先生碑東昌府學三絕碑
附續夷堅志承旨党公初在孕其母夢唐
道士吳筠來託宿爲人儀觀秀整望之如
神仙在西掖三十年以承旨致仕大安三
年九月十八終於家是夕有大星殞於居
東坡謂韓退之生也有自來而逝矣有所
爲以公生死之際觀之亦可以無愧斯語
矣

附堯山堂外紀党懷英字世傑號竹谿與
濟南辛幼安同師蔡伯堅筮仕決以著辛
得離決意南歸党得坎遂留事金

附香祖筆記金翰林趙秉文嘗述党懷英
論詩云律詩最難工五十六字皆如聖賢
中有一字不經鑪錘便如一屠沽兒廁其
間也按此五代人劉昭禹語党述之耳

全金言卷八

三



經
論
卷
八

三

